

Taarserpaa akissuteqaat qallunaatuani ullulernerqartoq 03-10-2017 kalaallisuanilu
ullulernerqartoq 02-10-2017
(Kalaallisua qallunaatuualu assigiinngissuteqarmata)

Naalackersuisut Atuarfik pillugu Inatsisartut inatsisissaat nr. 15, 3. december 2012-imeersup kingornalu inatsimmut ilanngunneqarsimasinnaasunut atatillugu atuuttumut nalunaarummut Meeqqat atuarfianni immikkut ittumik atuartitsisarneq aammalu allamik immikkut perorsaanikkut ikiorsiisarneq pillugu Namminersornerullutik Oqartussat nalunaarutaat nr. 22, 23. juli 1998-imeersumut tulluussaaqqinneqarnissamik peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Debora Kleist, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoq)

Siullermeerinnineq

Naalackersuisut Inatsisartunut ilaasortaq Debora Kleist, Inuit Ataqatigiit siunnersuummut qutsavigaat, Meeqqat atuarfianni immikkut atuartitsisarneq aammalu allamik immikkut perorsaanikkut ikiorsiisarneq pillugu nalunaarummik nutarterinissaq pillugu, taamaaliornikkut taanna meeqqat atuarfiat pillugu inatsimmut atuuttumut naapertuuttunngortinneqarsinnaaqullugu.

Naalackersuisut siunnersuuteqartoq isumaqatigaat nalunaarummik nutarterisoqarnissaa pillugu pisariaqartitsisoqarmat. Naalackersuisullu tamatumunnga atatillugu ilisimatitsissutigisinnaavaat maanna immikkut atuartitsisarneq pillugu nalunaarutissamut siunnersuummik nutaamik suliaqartoqareersimammat. Siunnersuut kommuninit, PPR-imit imaluunniit MISI-mit sinniisut qanimut oqaloqatigisarlugit suliaavoq, susasaqartunullu tusarniaassutigineqarearluni.

Ilanngullugulu ilisimatitsissutigisinnaavara atuarfinnut ilitsersuummut missingersuusiamik suliaqartoqarsimammat, iluarsisassallu kingulliit maanna suliarineqarmata. Taamaattumillu Naalackersuisut naatsorsuutigaat nalunaarut piffissami qanittumi akuersissutigineqassasoq.

Kiisalu aamma Naalackersuisut ilisimatitsissutigisinnaavaat Ilinniartitaanermut Aqutsisoqarfik maanna pilersarusiormat nunamit tamarmit peqataaffigineqartumik atuarfiit aqutsisuinik decembarip aallartinnerani ataatsimiititsinissamik, tassanilu aamma PPR/MISI-meersut aggersarneqarumaarlutik. Ataatsimeeqatigiinnermilu tassani immikkut atuartitsisarnermut nalunaarut nutaaq, tassungalu atasoq ilitsersuut saqqummiunneqassapput oqallisigineqarlutillu, soorluttaaq PPR-ip kommuninit ingerlanneqalersimanera nalilersorneqassasoq PPR/MISI aamma kommunini ingerlatsivinni pisortat peqatigalugit.

Oqaatigineqartutut Naalackersuisut naatsorsuutigaat immikkut atuartitsineq pillugu nalunaarut nutaaq qanittukku akuersissutigineqarsinnaasoq, taamaattumillu aalajangiiffigisassatut siunnersuut itigartitsissutigineqartussatut inassutigalugu.